


սեր<sup>9</sup>. Եւ 'ի ձեռն այսպիսոյ հօր փեսայի՝ թէ եւ հեռաւորի, առանց իւր ինչ ձեռն տալոյ՝ յաջողեաց մեծաւ պատերազմաւ՝ խորտակել (1210) զսուլտանն Ղըյասէտտին Քէյքաւուզ կամ Խոսրովշահ՝ ըստ մերոյ պատմչի<sup>10</sup>, որ եւ 'ի մարտի անդ սպանաւ: Բայց այսոքիկ յետ բազում ամաց, է որ 'ի պարոնութեանն եւ է որ 'ի թագաւորութեան Լեւոնի:



## Դ. Առաջին պատերազմունք եւ երկրակալութիւնք. Ասպատակութիւն եւ սպանումն Ռոստոմայ.

Իսկ զառաջինն անդէն իսկ 'ի սկզբան պայագատութեանն՝ յայսմ մարզէ (յարեւմտից) յարեաւ մրրիկն, 'ի նոյն սուլտանութենէ՝ հաստատելոյ 'ի մէջերկրեայս Փոքրուն Ասիոյ, գրեաթէ զուգաժամանակ հաստատութեանն Ռուբինեանց, որ զյոլովս 'ի նահանգաց գեղեցիկ այնր մասին արեւմտեան Ասիոյ՝ եհաս 'ի Յունաց. եւ երբեմն, որպէս յիշեցաք 'ի Դրուագի Ռուբինեանցն հարստութեան, 'ի նոցին իսկ 'ի Յունաց կայսերէն դրդեալ՝ յարեաւ երկիցս եւ երիցս 'ի վերայ քաջայադին Թորոսի Բ, եւ ոչ յաջողեցաւ առնել ըստ կամաց թելադրողին, եւ յետս եկաց, հաշտութեան պայմանօք. այլ հօրագոյն գրաւական հաշտութեան կամ զինադուլ առնելոյ ընդ երկոսին սահմանորդսն, ընդ Իկոնիացիսն ասեմ Թուրքս եւ ընդ Ռուբինեանսն հայս, բնապատուար կարկառքն Տաւրոսի կային, երկոցուն եւս դժուարանցանելիք, այլ ոչ իսպառ անդրժելիք. զի որպէս եցոյց նկարագիր բնութեան երկրին, ոչ որպէս զԿովկասեանսն միապաղաղ պարսպաձեւ

<sup>9</sup> Թեոդոր (որ † յամի 1222) այրի էր յորժամ էառ զՓիլիպպինէ, եւ ծնեալ 'ի նմանէ որդի մի վաղամեռ, Կոստանդին անուանեալ, զժտեալ ընդ կնոջն՝ դարձոյց զնա 'ի Հայս, եւ էաձ ա՛յլ կին (1213), (ոչ զիտեմ առ կենդանեա՛ւ Փիլիպպինեայ թէ մեռեալ գոլով սորա), զՄարիամ դուստր փռանկ կայսերն Կ. Պօլսի:

<sup>10</sup> Բայց եւ ինքն Թեոդոր յետ սակաւ ամաց (1214) գերի անկաւ 'ի ձեռս Ազգէտտին սուլտանի, եւ տուեալ ծանր փրկանս՝ գերծաւ: